

尤西堂
方望溪
尺牘

國學自修用書



上海中央書店印行

江苏工业学院图书馆
藏书章

1935

上海中央书店印行

民國二十四年一月出版

尤西堂
方壘溪
尺牘（合一冊）定價大洋五角

版權
所有
不准
翻印

出版者 平如衡

校訂者 儲菊人

印行者 中央書店

發行者 中央書店

全國各大書局均有代售

尤西堂尺牘目錄

賀督學程太史啓	一
賀張太守啓	一
賀嘉定劉明府啓	二
賀劉黃門啓	二
謝新安友人惠墨茶啓	三
夏日謝送團扇涼枕啓	三
謝人餽藥啓	三
代陳相公答馬總督啓	四
土翼總憲書	四
再上龔總憲書	六
上曹通政書	八
與宋荔裳憲副書	一〇
答周侍郎書	一〇

寄王大宗伯書	一一
寄陳大司空書	一二
公致王孝廉書	一四
公留剖公住山書	一七
公請物外禪師書	一八
答蔣虎臣太史書	一八
答蔣虎臣太史書	二〇
答黃九烟	二一
答王阮亭	二一
答王阮亭	二二
答宋荔裳	二二
追薦諸亡友啓	二三
遺亡友湯卿謀書	二三

尤西堂尺牘 目錄

戲與瑤宮花史書……………二五

尤西堂尺牘

賀督學程太史啓

伏以翰林逼華蓋。文星朗耀于西京。綸閣對紫微。旦月高懸於北斗。借判花之大筆。論定千秋。懸視草之弘文。起衰八代。木天動色。水鏡增輝。恭惟某官鳳掖仙姿。龍眠瑞氣。兩夫子之理學。能世其家。太史公之文章。可華於國。風搖鈴索。秉歸院之金蓮。日上花磚。吟翻階之紅葉。紫誥裁三管。久仰儒宗。黃麻似六經。允宜師範。特膺簡命。爰執文衡。暫謝承明之廬。來設扶風之帳。春風夜雪。依然頤顙門牆。秋露晨泉。蔚矣卿雲河漢。彬彬文質。將還商周盤詰之遺。落落風飈。頓洗燕趙悲歌之習。採輶軒者十五。必首周南。取騶牝之三千。遂空冀北。他年河朔。並照青藜。此日關中。遙瞻紫氣。職擁書吳。下捧檄遼西。頗懷合組之思。生逢裸壤。雅慕鳴琴之治。遠適豐鄉。瘳馬獨吟。窮魚堪賦。幸戴二天之覆。兼叨一日之知。地附桑梓。溪分桃李。三年魚素。曾達龍門。百尺鸞坡。還親臯座。未及望塵而拜。敢先削牘以迎。敬俟下風。伏祈台照。

賀張太守啓

恭惟某官三戟名家。兩京雅望。山陰道上。著含鷄鳴鶴之才。夕宿班中。擅轉筋筭鞭之敏。競千巖而爭萬壑。胸吐青虹。襟三江而帶五湖。眼空白馬。遂轡熊軾。爰剖魚符。朱幡飛香水之溪。皂蓋駐錦帆之里。衙時龍戶。歌舞鷄陂。上日馬人。奔趨鶴市。黃堂烟雨。獨吟畫戟之詩。翠幙管絃。皆奏袞衣之操。一襦五袴。

宛然麥秀家風。五馬雙旌。正爾葦蕘勝地。此十萬戶之福也。其二千石之良乎。治某吳下阿蒙。方外司馬。岸幘將軍之石。目斷吳山。杖藜孤竹之祠。懷深燕市。班荆疇昔。每思霖雨三年。望氣今朝。又喜福星一路。兩地之交如故。二天之戴可知。龍門在望。悵虛竹馬之迎。虎阜載馳。敬走素魚之寄。薄申燕賀。仰冀鴻涵。賀嘉定劉明府啓

恭惟某官天半朱霞。雲中白鶴。青藜照讀。姓氏著于三韓。黃絹裁文。聲名騰于孤竹。學優則仕。國爾忘家。上體天子已飢已溺之心。下憫斯民靡室靡家之苦。解衣推食。待以舉火者百家。秣馬脂車。其究安宅乎千里。遂使鳩形鵠面。胥爲豐沛之民。因之華轂朱輪。首擢范陽之令。爰飛一鶴。夙駕雙鳬。製五袴于礪城。播兩岐于練水。應念賣絲糶穀。易地皆然。何難簞食壺漿。舉斯加彼。治弟本家吳下。遠宦遼西。繪流民之圖。有心鄭監。吹寒谷之律。無術鄒生。每歎仁人長者之用心。能使鰥寡孤獨之得所。何幸北平之荒穀。復爲南國之甘棠。桑梓皆華。黍苗如雨。門連白馬。竚看騎馬之迎。塞絕盧龍。未遂登龍之願。敬修束帛。先遣雙魚。敢云置之袖中。幸勿麾之門外。

賀劉黃門啓

恭惟某官。狸首文章。魚頭梗概。越石清剛之氣。日映青蒲。更生慷慨之風。霜寒丹甌。龍批不避。九重嘉封事之忠。豸觸何辭。四海知彈文之正。身輕似葉。名重如山。猷畝歸來。方有清露新桐之樂。深宮寤歎。已懷疾風勁草之思。封檢日邊。賜還天上。召賈生于宣室。還收痛哭之書。起謝傳于東山。獨擅風流之譽。

蒼生繫望。烏府增聲。某素仰斗山。幸親衡宇。索米長安之日。曾掃龍門。懸弧初度之辰。恭承兕爵。思趨松徑。喜御蒲輪。天子有爭臣。吾將洗樽而祝。聖朝無闕事。公且焚草以行。願聽鳳凰之鳴。薄申燕雀之賀。敬當負弩。佇俟彈冠。

謝新安友人惠墨茶啓

文房太守。墨號玄香。花苑通侯。茶封不夜。代郡爰稱鹿角。建溪厥印蟬膏。松烟出自廬山。石花產于蒙頂。兼斯二妙。獨有新安。烏聊山下。丸作龍紋。靈巖洞中。片如玉乳。喜頒雙笏。足染三縑。驚試一旗。遂消七碗。墨云黑。茶云白。價並千金。茶則新。墨則陳。香同三昧。傳家烏玦。如看劍脊之花。供佛紫茸。不數穆陀之槁。中山管子。對此忘形。陽羨書生。聞之短氣。試將墨汁。波及右軍之池。并取茶經。寫在仙人之掌。

夏日謝送團扇涼枕啓

周王鵲翅。扇號游飄。韋后豹頭。枕名辟魅。宋主畫成蟬雀。唐宮寶製鷓鴣。是物雖奇。非時弗貴。當茲消夏。祇取迎涼。蒲葵窈窕。謝公捉此欣然。袖榴欒欒。張子賦成率爾。七輪持贈。不殊元寶。龍皮雙粲。攜來可比商山鹿角。倚烏皮之几。麈尾同揮。臥白石之牀。魚鬚共捲。豈止班姬執素。裁作合歡。玉女紅蕤。頗爲益壽。許持障面。不教憔悴。王郎取代曲肱。儘足逍遙莊子。庾亮南樓之上。習習生風。陶潛北窗之前。于于入夢。

謝人餽藥啓

僕風月膏肓。煙花痼疾。同馬卿之消渴。比盧子之幽憂。忽啓雙魚。如逢扁鵲。贈之芍藥。投我木瓜。紫蘇與白芷同香。黃蘗共紅花相映。雖云小草。卽是大丹。月宮桂樹。竊自姮娥。台洞桃花。採從仙女。一杯池水。堪資文室之談。半七神樓。頓醒鈞天之夢。肺腑能語。羊叔子豈有酖人耳目。發皇楚太子無勞謝客。

代陳相公答馬總督啓

伏以青袍白馬。干城生玉帳之威。紫蓋黃旗。甲仗壯金壇之色。筦北門之鎖鑰。德雨千家。繡東國之衣裳。福星一路。天子命之六月。老臣誦以清風。恭惟某官。奮跡從龍。膺符分虎。名標銅柱。伏波之家世。堪傳策著金城。橫海之樓船。足紀六韜三略。有熊羆虎豹之才。八陣五花。得天地風雲之氣。萬邦憲其文武。四國待以蕃宣。爰駕雙車。往綏三輔。鸞書玉軸。降自宮中。壽甲堦戈。專于闔外。鎖將金鎖。印銷海岱之烟。鈎用玉鈎。簾捲燕臺之月。綸巾羽扇。鐵如意指揮三軍。緩帶輕裘。金僕姑獨當一面。漁陽老將。皆隨赤羽之旂。魯國諸生。半入紅蓮之幕。河山萬里。歌舞紛來。雲日九重。股肱斯托。某海隅固陋。冀北驚駘。濫吹竿于金門。懼覆餗于玉鉉。延英東閣。思范公數萬甲之才。議事南衙。求孫子十三篇之略。庾樓在望。每懷風月之談。李壁方新。長燭斗牛之氣。有書尺一。辱文藻之續紛。其車三千。仡武功之赫濯。路車乘馬。遠慚雙鯉之投。玉案金刀。未展七襄之報。

上龔總憲書

恭惟閣下北斗上公。南山君子。起大小龔之後。卓爾不羣。介左右流之間。峨然獨秀。有鐵石梅花之

氣概兼山川香草之風流。鼓吹六經。而丘索典墳如琴瑟笙簧之並奏。鹽梅九鼎。而兵農禮樂若羔膾蠶
膾之咸宜。爰貳爽鳩。白雲起而園扉鞠草。俾專司馬。紫蓋見而玉帳生風。久造膝于席前。遂彈冠于柱後。
擅烏府先生之望。七貴泥樓。聽驄馬御史之謠。三公避路。摧剛直枉。舍狐狸而問豺狼。指佞觸邪。視鷹鷂
之逐鳥雀。霜風捲地。霖雨回天。朝廷頒其議于政事之堂。則爲快活條貫。草野鋟其書于金石之錄。皆曰
忠愛文章。總一臺之紀綱。楊橫豸角。秉九流之刀尺。簪盍龍門。庶乎得聖人之清。如此任天下之重。雖兒
童走卒。盡知安石之爲蒼生。况屬吏門生。不仰季長之有絳帳。聞風能立。觀海思歸。侗吳下阿蒙。南州孺
子。操三尺管。輒輕千騎。東方擁五車書。漫擬百城南面。十年不遇。遂令鄧禹笑人。四海無儔。未見鮑生知
我。臣飢欲死。壁立相如。予去何之。塗窮阮籍。竟折腰于五斗。將餬口於四方。仕有時乎爲貧。顧慚小草。出
無辭於排難。正遇盤根。遠成功名。端憂歲月。王粲登樓之日。淚滿青衫。班超出塞之年。愁生白髮。李將軍
之故地。夜聽邊聲。王車騎之閒曹。朝看爽氣。文成鸚鵡。禰衡悲尸冢之間。跡寄鷓鴣。張華感樊籬之下。翟
尉之門羅雀。松菊無存。史雲之釜生魚。樵蘇不爨。焚琴煮鶴。一飽無時。納履捉衿。孤寒何地。坐然明於堂
下。孰許論心。逢甯戚於車前。誰憐扣角。鸞臺鳳閣。無非甲乙之才。幸野磻溪。終是斗筭之器。以家門考經
濟。則由求從政。甯居陽貨之先。以科第論文章。則李杜稱詩。必出顏標之下。自非九方相馬。肯略牝牡驪
黃。或者大匠掄材。不棄輪囷枯朽。荆山不剖。卞和泣血以相明。豐城久埋。雷煥望氣而自躍。鍾期未遇。朱
絃無三歎之音。般郢當前。鉛刀有一割之用。求人非易。知己良難。昔國子先生屢上書於宰相。汝南太守

亦自贊於康成。愚固不倫。願實相等。楷模在望。孔融登元禮之門。奇字滿牀。侯芭入子雲之室。敢言桃李。聊借參苓。伏望尺寸兼收。斗升分潤。操其長綆。援絕壑之行人。假以餘光。照寒鄰之績女。老驥伏櫪。尙効馳驅。飛鳥依人。甯忘飲啄。苟以蟲臂鼠肝爲足用。將附龍鱗鳳翼而彌彰。至乃風雅一塗。不啻編摩數載。湘東三管。筆冢會封。鄴下五言。詩城自築。登山臨水。不無刻羽之聲。弄月嘲風。每有雕蟲之悔。方外司馬。長嘯恆多。江東步兵。短歌間作。辟草蛩之吟。雨壑。真布鼓之過雷門。所賴弘獎風流。抽揚月旦。排沙簡寶。舍短收長。點鐵成金。改嬾作好。筆則筆。削則削。一字南金。步亦步。趨亦趨。終身北面。小子有造。荷明師之教。成大言。不慚資鉅公之絕倒。

再上龔總憲書

語云。士爲知己者用。女爲悅己者容。然則士非知己。固無可用之日矣。夫使士終身不遇知己。而不用。或誤爲不知己者所用。二者皆無足惜。惟是遇知己矣。上欲援之而阻於格。下欲攀之而懸於勢。逡巡却顧。而時已去。機已失。使知己有不獲用士之憾。使士有不克効用知己之羞。斯足爲天下所大痛耳。今有畜千里之馬者。以駕鹽車於九折之坂。旁人不識也。伯樂過而識之。其馬淒然長嘶。伯樂亦潛然流涕。乃告其主曰。此良馬也。又稍稍語其旁人。然是馬也。風霜憔悴之形。厓谷顛蹄之狀。皮相者無一取焉。且田野之子。農行三十里。賈行五十里。乘千里馬安之。雖其旁人。亦無能以千金市之者。設有圉人牧吏。飾以金羈。絡以玉勒。騎而致之長安大道之東。洛陽小苑之西。星飛電躍。光采炫耀。左右歎羨。價增十倍。然

是馬也。甯老死於九折之坂。而不願爲圉人牧吏所得。何者。感伯樂之一顧。而思爲之用也。今世所謂伯樂者。舍閣下其誰哉。攬四方之綱紀。秉百工之刀尺。位已尊矣。望已隆矣。文章經濟。赫然稱當代一人矣。而猶傾心於下吏。肯首於愚生。褒尺寸之才。揚纖毫之美。故長安四方之士。郵相傳說。莫不慕閣下之知。侗爲特奇。而幸侗之受知於閣下爲獨至也。然侗之年。已踰三十矣。跼蹐於卑官。棲遲於絕塞者。三年於茲矣。今秋一病五十餘日。假使三日不汗。七日不食。則卒然溘霜露。填溝壑。雖欲長侍門牆。豈可得哉。又使掌銓衡者計其年限。等其資格。授以遠方一丞。則侗必流離坎壈於山巔水涯之外。終不得奮其舌而昂其首。否則南山之南北山之北。侗將長爲農夫以沒世。而玉階方寸地。迄不敢望焉。侗固已矣。獨使長安四方之士。郵相傳說。以爲有知己如此。而士尙不用。有士如此。而尙不爲知己用。相須何殷。相遇何殊。有不慕者轉而爲歎。幸者變而爲悲哉。昔馬周年僅四十餘耳。太宗及其壯而用之。遂成貞觀之治。賈誼年亦三十三。文帝知而不用。竟死長沙。向使文帝及賈生之壯。而盡其才。功名豈在馬周下。而二子遇不遇懸殊者。則以賈誼排於絳灌。馬周引於常何。士固伸於知己。而詘於不知己者。諒矣。夫才雖天生。而器由人造。豫章之才。莫不知其良也。荆山之璞。莫不知其貴也。然木與石默而不言。一旦有匠焉。斧之鋸之。曲之以爲輪輻。方之以爲門戶。有匠焉。琢之磨之。雕之以爲杯棗。飾之以爲佩環。而木與玉終無言以自明焉。徒使建章之樗櫟。明堂之砮砮。笑人千載。而其時卽有卞和郢石者見。亦相與悔恨而莫及。豈不哀哉。然馬之遇伯樂。木之遇郢石。玉之遇卞和者。十有八九。其不遇者偶耳。顧與其流涕於未遇之時。悔恨

於不遇之後。不若馬之善鳴。木與玉之能言者。脫田野之足。去拙匠之手。不爲圉夫牧吏所得。與樗櫟砭砭所笑。故以狂瞽之言。陳於知己之左右。幸憫而察之。

上曹通政書

侗聞之。自銜自媒者。士女之醜行也。於時求進者。道家之明忌也。是以毛遂贊於趙相。君子譏之。方朔鬻於漢廷。賢者爲恥。語曰。抱璧途乞。無爲貴寶。儒者大雅。固不屑矣。然而騏驥逐九折之坂。見伯樂而長嘶。梧桐生於千仞之岡。遇子牙而發響。何則。相皮者衆。知音者希。鹽車雖困。不邀剪拂於圉人。梁木雖隆。不吐宮商於匠石。此越石求伸於知己。昌黎貴遇於大賢。豫讓許身於知伯。侯喜矜色於盧公。古既有之。今亦宜然。夫車鐸至微。荀勗取以和樂。爨材垂朽。蔡邕斷以成琴。牛溲馬渤。而越人求之。竹頭木屑。而陶公不棄。是故物無美惡。當時則貴。士無賢不肖。遇人則名。遽蔭入宮。目以蛾黛。螯韭登俎。配於雕胡。撥其枝葉。則椒蘭無馨香之芳。假其羽毛。則燕雀有飛鳴之勢。所以蟠木求其先容。圭璋貴乎特達。兩美必合。尙庶幾焉。恭惟閣下。四海偉人。千秋作者。文章高視西京。意氣比倫東國。如泰山北斗。莫不仰其高。而景星慶雲。爭先覩爲快。方今大道平康。四門雍穆。鵷鷺盈於九列。夔龍布於兩階。而閣下于焉至。謬謬以昌。作朕股肱。爲王喉舌。宣室之論。天子獨重賈生。武帳之奏。公卿皆憚汲黯。矧夫蓬茅布褐。郡邑簪纓。接其丰采。草木之藉陽春。承其美談。魚龍之逢風雨。有不延頸龍門。摩肩鐵限者哉。若侗者。江表腐儒。蘆中窮士。讀古人書。五經六藝之說。旣聞其詳。友天下士。三君八及之名。亦知其概。志大而才不逮。氣矜而

力不足。名隨謗至。命與仇謀。書十上而不行。學三年而不穀。易衣并日。悲歎窮廬。於是遠追抱關之義。近維捧檄之心。身既可以許人。仕有時乎爲養。夫莊周游戲於漆園。曼倩浮沉於金馬。達人之高致也。長孺薄淮陽而不爲。士元守耒陽而不治。志士之遠謀也。以侗視之。皆非其比。自無舊業。敢恥微官。一命雖卑。陳力就列。孰意蹇而又蹇。放此邊關。長沙卑濕。賈太傅之傷生。潯陽蕭條。白司馬之掩泣。既謝投筆之功。但增掣肘之患。頗抱鳴琴之興。時懷索米之憂。歌不飽而兒啼。賦無衣而婦歎。涼風九月。塞雁南飛。哀杵亂鳴。悲笳互動。望長安而日遠。睇吳市而雲飛。秦公子之登樓。楚大夫之處廓。感時撫景。惆悵何言。亦嘗驥首青冥。思自奮激。而泥塗侁促。振拔無由。唐人謂三十老明經。五十少進士。以侗年境當之。正子桓所云已成老翁。但未頭白耳。夫漢以策取士。而班馬揚雄不與。唐以詩制科。而李杜浩然遺之。下者勿論。豈子虛太玄不及公孫春秋。北闕南山。不如湘靈鼓瑟乎。然非破拘攣之見。馳域外之觀。鮮能物色於風塵。網羅於廖廓。世俗悠悠。奉明經爲鴻寶。祕聖書爲金科。執斯以概。則屠釣胥靡。終非俊物。貴郎掾吏。必乏奇才。磊落不羈之士。有槁死岩穴。投老遐荒耳。惡能揚眉抗手。陳誠懇於本朝。行話談於當路哉。雖然甯不恥飯牛。而商歌以感管仲。王猛不差捫蝨。而雄辨以動桓公。李白上書相國。而自署海上釣鰲客。王適投刺將軍。而自名天下奇男子。侗雖不敏。請待下風。倘不麾之門外。則升堂入室。小子何敢讓焉。金非莫邪。而類躍冶。玉豈連城。而將泣血。賤似葑菲。而思下體之採。質同駘騫。而求一顧之知。齒牙餘論。願先生勿惜也。侗自束髮。學爲詩歌古文詞。慕吉甫之穆若。懷德璉之斐然。戶牖都着。刀札遂有。然昌黎以爲

大慙。子雲悔其少作。世無玄晏。則太冲三都。未免覆瓿耳。以閣下黃初家世。正始元音。金石笙鏞。會龔而鼓。秋水向若。奚啻大巫。顧鳳輝丹穴。華蟲猶飾於林中。虎嘯谷風。蟋蟀尙吟於床下。雖不自諒。各有所長。青蓮烏夜之作。賀監解貂。昌谷雁門之行。文公束帶。才雖愧於古人。事實希於往轍。絕塞無友。俗吏寡聞。竊恐刻鵠不成。探驪未得。守井蛙之見。貽遼豕之嗤。敬錄篇什。仰陳函丈。幸而教之。感且不朽。以筵撞鐘。以蠡測海。放言無章。伏望寬其督責。少垂察焉。

與宋荔裳憲副書

前者仙舟經於敝邑。殊乏菱蒲之獻。虛邀蓬華之輝。顧影知慚。望塵增悵。恭惟閣下爰自燕山。聿綏海甸。風流吐納。襟三江而帶五湖。才略縱橫。競千巖而爭萬壑。黃旗晝見。紫氣秋高。某本菰蘆。有如樗櫟。嘗仰昌黎之北斗。得交安石於東山。邂逅登龍。追隨附驥。竊訂千秋之雅。相將十載於茲。至如季布居官。恆遭謗議。屈平去國。不乏離憂。每荷包容。更加推輓。此拔山超海。負德難勝。垂露懸針。書恩不盡者也。惟是放逐以來。窮愁日甚。叩門乞食。終無一飽之歡。閉戶著書。未免單寒之苦。歎遭逢其已矣。矢報効以何從。信乎枯木朽枝。無取才於哲匠。或者遺簪墜履。不見棄於仁人。決西江之水。可活枯魚。垂北海之雲。自依窮鳥。雖有驚馬。差許驅馳。毋論鉛刀。亦堪剗割。庶幾田文門下。仍留長缺之賓。庾亮樓中。不去胡床之客。既兄行李。附候旌麾。率爾無文。定資絕倒。

答周侍郎書

僕束髮受書。卽知中州有元亮先生。昌黎所謂景星慶雲。潁濱所謂高山大河也。今乃得登龍門。親燕笑。不勝喜慰。二十年夢寐爲不虛矣。僕亦嘗北走燕趙。南入閩越。中歷齊魯楚豫之區。求當世之大人先生者而從之遊。大約錢穀之外。別無政事。簿書之外。別無文章。拜跪之外。別無面目。酒食之外。別無肝膽。天下士有投一刺獻一書者。不標之大門。則束之高閣耳。嗟乎。被龍章於裸壤。奏韶樂於龔俗。誰爲爲之。孰能聽之。此虞生所以歎恨於青蠅也。求其下士之誠好文之篤。如閣下者。有幾人哉。信乎相須之殷。而惜乎相見之晚。使僕於二十年前。遊大賢之門。稍得吐捫蝨之談。奮雕蟲之筆。斟酌千秋。馳驅萬里。或有可觀。小草雖微。亦藥籠中物也。至今日周游晚歸。風雨相半。焚書瘞筆。投老空山。雖有尺寸之才。亦焉用文之而已。雖然。僕之向往。則有在矣。濟南生云。國家無吾輩文章之士。則鳳鳥不鳴於岐山。而仁獸化爲鸛。夫麟鳳雖不常生。然必間世一出。不然者。怪鴞登壇。野干執幟矣。鷦鷯決於榆枋。亦慕丹山之彩。驅黃蹠於棧樞。亦仰大角之祥。惡有對怪鴞而長鳴。朝野干而率舞者哉。承頌大集。於大江中讀之。砰礚澎湃。與潮音相答。洵奇觀也。尺牘一選。尤見精詳。子桓稱元瑜書記。翩翩作樂。而劉公一紙。至賢於十部從事。豈小道哉。竊不自揣。錄近作數首。呈之典籤。明鏡在前。雖嫫母無所匿其醜矣。亡友湯卿謀。少年早夭。其遺集湘中草。可以傳世。而未得其人以傳。知明公於存沒之誼最深。故摘其尺素數則寓覽。此未足知人才之萬一。蓋哀其無聞。庶乎附作者以彰焉。伏惟留意。

寄王大宗伯書

侗自辭絳帳。遂出青門。策蹇足以言旋。挂征帆而長往。於斯朱夏。爰渡黃河。雖去國之悲。平生已矣。而歸田之適。意氣浩然。松菊猶存。琴樽無恙。便當躬披短褐。手執長鑱。釣魚東海之濱。種豆南山之下。聊云卒歲。敢曰違時。惟是刀筆小吏。受至尊之知。章句庸儒。奉大賢之教。而功名不立。學業無聞。霜露忽凋。草木同腐。以此抱愧。未能解憂耳。然而易著見幾。書稱知命。侗雖不敏。請事斯言。所賴仰託門牆。俯哀溝壑。知白雪之寡和。附青雲而益彰。苟達微忱。甯愁遠道。時因羽使。率候興居。書不盡言。翹首而已。

寄陳大司空書

侗嘗聞之古人曰。薦賢爲國。非爲私也。而語又云。士爲知己者用。二說似相反。而實相成也。夫拜爵公朝。謝恩私室。君子非之。然揆之人情。有不能已者。士當貧賤之時。居無鄉曲之譽。出無廊廟之援。名沒齒而不稱焉。設有一人。哆口而譽之。垂手而援之。俾得奮其舌而伸其筆。雖未榮貴其身。鮮有不感於心。動於色。流連慨慕而不能忘者。虞翻所謂天下得一人知己。可不恨也。此在比肩之輩。尙爲刎頸之交。而況遇合於鉅公。見推於大賢乎。鄒陽有云。無因而至前。雖出隋侯之珠。夜光之璧。祇足結怨而不見德。有人先容。則枯木朽株。樹功而不忘。信乎莫爲之前。雖美弗彰。士之待舉。亦猶是矣。顧古之薦賢者。舉爾所知而已。周公之時。執贄而見者十人。還贄而見者三十人。貌贄之士百餘人。趙武所薦白屋之士。筦庫者六十家。豈必人與之相得。家與之相識哉。今之薦賢者。則異是。非有肺腑之戚。則弗親也。非有銜盃酒之歡。則弗信也。無左右乎繆公之側。則弗思也。不日掃平陽之門。則弗見也。雖有盛名之下。觀聽望深。而聞